

Date –01/10/2023

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Ni zung chakna hmanga South Chawngtuia tui pump-na chu nimin khan Commerce & Industries Minister Dr. R. Lalthangliana'n a hawng.
2. Ram pum huap Faina beihpui thlakna ni 15 atanga tan Swachhata Hi Seva chu Mamit district-ah pawh sorkar department hrang hrang leh village council te hmalaknain tan chhoh mek a ni.
3. Reserve Bank of India (RBI) chuan Cheng 2000 note thleng theih hun chu October ni 7 thleng a pawtsei.
4. Hangzhou, China-a nghah, Asian Games 2023 khelh mekah India chuan Gold 10 tiamin Medal 38 a la tawh.

<><><>

South Chawngtui Solar Pump Opened

Cheng Nuai 352 Sing 7 Sang 5 senga ni zung chakna hmanga South Chawngtuia tui pump-na chu nimin khan Commerce & Industries Minister Dr. R. Lalthangliana'n a hawng.

Minister chuan South Chawngtui khuain a mamawh em em, tui hnianghnar tak an nei ta chu vantlang mipui tan thil chhinchhiahtlak leh hmasawna ropui tak a ni, a ti a. Tangkai taka South Chawngtui leh a chhehvel khua ten an hman theih nan duhsakna a hlan a.

Dr. Lalthangliana chuan hmanni lawkah Cabinet thutluknain South Chawngtui High School chu Lumpsum Aided atangin provisional Adhoc Grant-in-Aid-ah hlankai a nih thu pawh sawiin, hei hian zirlaite bakah zirtirtute leh nu leh pateah chona thar pe se, a ti a. Thahnemngaihna leh taimakna nêh mithiam chher chhuah nan hmang turin a chah a, tunlai inelna khawvelah mi hlawhtlingte chu mi invawng thei leh tih tang tang peihna nun nei te an ni, a ti a. South Chawngtui atangin lekhathiam tak tak, Mizoram nghahfak an chhuak thei a ni tih ring nghet tlat tur leh chhel taka inbuatsaih thin turin kalkhawm mipuite a chah a ni.

Nimina hawn tak Chawngtui Solar Pumping Scheme hi Jal Jeevan Mission (JJM) hnuaia siam a ni a, ni tin darkar 6 atanga darkar 7 chung tui pump thei tura ruahman a ni. Tuna an tuizem neih hi tui litre Sing 5 dawng a ni a, tui connection nei chhungkaw 159 chawm zo tura ruahman a ni.

(DIPR)

<><><>

Reiek - Tourism

Tourism Minister Pu Robert Romawia Royte chuan Reiek khuain tlawhtu khualzin leh ngaihventu a ngah zual dawn avangin khawtlang mipuite'n tun hma aia tan an lak zual a ngai dawn, a ti.

Best Tourism Village of India 2023 lawmman an dawn Reiek khuain nimina an lawm a hmanpuinaah he thu hi sawiin Pu Robert Romawia Royte chuan khawvel pum huap Best Tourism Village inelna buatsaih mekah Reiek chu lawmman dawng thei tur zinga chhawpchuah mek a ni, a ti a. Beiseina sang tak nen an thlir mek tih

sawiin Reiek mipuite chu khualzinte lo dawnsawn kawngah Best Tourism Village lawmman dawngtu an nih ang ngeiin hawihhawm chhuah zel turin a chah a ni.

Minister hian Pilgrimage Rejuvenation And Spiritual Augmentation Drive (PRASAD) hnuai hmalakna tur a hawng nghal baw a. Hei hi Khuangchera Puk leh Reiek Tlanga Pilgrim Facilitation Centre, sawrkar laipui Tourism Ministry hnuai Cheng Nuai 361 leh Sing 2 sang 7 senga thawhna tur a ni a; kum 2025 June thlaah thawh zawh tur a ni a. Aizawl Mission Venga hmunpui nei Excell Consultancy Services chuan hna hi an thawk ang.

Nimin vek khan Minister hian Reiek Tlanga hmasawna hnathawh, NESIDS hnuai Cheng Nuai 560 senga sak chu a hawng nghal baw a. Best Tourism Village lawmna leh NESIDS leh PRASAD Project lungphum phumn pual hian khawtlang huap ruai buatsaih a ni.

(DIPR)

<><><>

Mamit - Swachta

Ram pum huap Faina beihpui thlakna ni 15 atanga neih tan Swachhata Hi Seva chu Mamit district-ah pawh sorkar department hrang hrang - UD&PA, PHE, LAD leh Mamit district chhunga RD Block 4 -a BDO office te leh khaw tina village council te hmalaknain tan chhoh mek a ni.

Faina beihpui thlakna, Swachhata Hi Seva pual hian Mamit LAD department leh Mamit district chhunga RD block 4-a BDO te chuan an bial chung Village council tinah faina chungchang inzirtirna leh veng chung tihfai hnatlang ko tura thuchhuah an lo siam angin Mamit district chhung khaw hrang hrang Village Council te chuan an khua leh veng chung tihfai hnatlang ko in hma lak chhoh mek zel a ni a, ninim pawh khan Mamit Luangpawl Village Council te chu an veng chung inkalpawhna leh khawlai dung te tifaian an hnatlang a ni.

Swachhata Hi Seva pual hian Mamit district chhunga khawpui chinah Mamit UD&PA-in hma a la a, khaw tē zawkah te Mamit PHE WATSAN Division ten hma an la thung a ni.

Swachhata Hi Seva pual hian Mamit khawpui chhunga sorkar department thenkhatte pawhin an office leh a vel tihfai hnatlang an ko chho mek baw a ni.

(RD Darthanzauva Mamit PTC)

<><><>

MNF Press Conf.

MNF Party chuan Mizoram chu state pachhia leh thawhchhuah nei tlem ni chungin ram chhunga leiba nei tlem ber dawttu a ni, an ti.

MNF Media Department chuan ninim khan Aizawl Press Club-ah thu thar thehdarhtute kawmin Mizoram sum dinhmun an sawi a. Reserve Bank of India (RBI)-in kumin January ni 16-a Annual Publication a tihchhuah “State Finance: A study Budgets” tarlan dan chuan India ramah Sikkim leh Mizoram ten leiba an nei tlem ber a, an leiba chu Cheng vaibelchhe 9,555 leh Nuai 7 leh Cheng vaibelchhe 10,217 leh Nuaih 1 a ni, an ti.

Pawisa puk chungchangah pawh Finance Commission rawtna angin Normal Borrowing Ceiling (NBC) limit pawh GSDP atanga zaa 3.5 tuk a ni, an ti a. State sorkarin a duh zat zat pawisa a puk thei lova, a dinhmun mil tawk zelin a puk mai thin zawk a ni, an ti baw.

MNF chuan Mizoram sum dinhmun chu tha tak erawh a ni lo tih an pawm thu an sawi a; chutihrualin Pathian leh mipui zarah sum chungchanga harsatna awm mek chu phurh chhuah an huphurh lo tih an sawi bawk.

(Corr)

<><><>

MPCC

Mizoram Pradesh Congress Committee (MPCC) chuan tun hnaia Mizoram sawrkar Cabinet-in school hrang hrang Grant in Aid pek tura a tih zinga mi Siahaa awm Zasai Memorial High School chu school awm tawh lo a ni, an ti.

Nimina Aizawl Press Club-a chanchinbumite an kawmnaah MPCC media Dept. chuan, Zasai Memorial High School chu Siaha MNF MLA candidate tur Pu Lalmalsawma Zasai pa Pu Zasaia hriat reng nana school din a ni a, kum tam tak kal tawha tihtawp niin a building thenkhat te pawh mimalin khawsak nan an luah deuh vek tawh a ni, an ti.

Mizoram chhunga mimal, khawtlang leh kohhran school tam takin sawrkar atanga tanpuina an dawn theih loh laia puihna dawng tura school awm tawh lo thlan a ni chu mak an tih thu an sawi a. Hemi chungchangah hian Congress party chuan Mizoram sawrkar chu a rang thei ang bera a thutlukna sut leh turin an ngen tih an sawi a ni.

(Corr)

<><><>

ZPM Kolasib Block

Kolasib Block ZPM hnuiaia Vigilance department chuan Meidum khuaa Pradhan Mantri Awas Yojana Gramin-Scheme (PMAY-G) hnuiaia In sak tanpuinaah felhleh a awm niin an sawi.

Kolasib Block ZPM hian nimin khan Kolasib Press Club-ah chanchinbumite an kawm a. Right to Information Act 2005 (RTI) hmang an zawhna chhan a nih danin PMAY-G In sak tanpuina hmu tura thlan, a taka tanpuina hmu si lo chhungkaw 33 an awm, an ti.

In sak tanpuina dawng tawh anga ziah, mahse a taka la dawng si lo te chanai chu eisaktu an awm ni-ah an ngai a, hei hi tha lo an tiin mirethei zawkte rahbehna leh intham lohna lian tak nia an ngaih thu an sawi bawk.

Kolasib Block ZPM hruiatute chuan he thil chungchang hi an bialtu MLA, Minister Pu K. Lalrinliana an hriattir tih sawiin, in sak tanpuina dawng tur dik tak ten an dawn theih nan an theih ang tawkin hma an la zel dawn tih an sawi a ni.

(Andrew Vanlalauva, Kolasib PTC)

<><><>

RBI EXTENDS LAST DATE TO EXCHANGE 2,000 RUPEE CURRENCY NOTES TILL 7TH OCTOBER

Reserve Bank of India (RBI) chuan cheng 2000 note thleng theih hun chu October ni 7 thleng a pawtsei.

RBI chuan thuchhuah siamin, cheng 2000 note thleng theih hun tura a ruat chu September ni 30, nimina a lo tawp tak avangin ennawn a ni a, October ni 7 thleng pawhsei leh a ni ta a ni.

Chhianchhiah dan chuan, kumin Many ni 19 khan cheng 2000 note chu cheng Vbch nuaih 3 sing 5 sang 6 siamchhuah a ni a. Hemi atang hian nimin piah, September ni 29 thleng khan cheng Vbch nuaih 3 sing 4 sang 2 chu thleng let leh tawh a ni a. A la bang chu cheng Vbch sing 1 sang 4 a la ni a. May ni 19-a cheng 2000 note siamchhuah atanga za-a 96 chu bank lamah thleng kir a ni leh tawh tihna a ni.

(NewsOnAIR)

<><><>

MANIPUR CM N. BIREN SINGH DISTRIBUTES ONE-TIME FINANCIAL ASSISTANCE TO BENEFICIARIES AT RELIEF CAMPS

Manipur Chief Minister N Biren Singh-a chuan nimin khan state chhung buaina avanga Relief camp-a awm zirilaite sum faia tanpuina a sem a. Hei hi Special Scheme for Education of Children of Labour Card Holders hnuai sem a ni.

He scheme hnuai hian Sawrkar chuan Labour Card nei, Manipui buaina avanga Relief Camp-a awm chhungkuate chu naupang zirna senso atan cheng sang 5 theuh a tumsak a ni.

He hunah hian Chief Minister chuan tharum thawhna avanga an in leh lo rauhsan, an in halsak emaw tihchhiatsak emaw nilote chu an in leh lova an inbenbel leh mek tawh thu a sawi a. An in leh lo halsakte erawh chu sawrkarin in thar saksak a tum thu a sawi a ni.

(NewsOnAIR)

<><><>

ASIAN GAMES: INDIA WINS 2 GOLD, 2 SILVER AND A BRONZE ON DAY SEVEN

Hangzhou, China-a nghah, Asian Games 2023 khelh mekah a ni 7-na nimin khan India chuan Gold 2, Silver 2 a lak belh leh a. Heti hian India chuan Asian Games 2023-ah hian Gold 10, Silver 14 leh Bronze 14, a zavaiin Medal 38 a la ta a ni.

Nimin khan metre sing 1-a thui intlansiakah Kartik Kumar leh Gulveer Singh-a te chuan silver medal leh bronze medal an la a. Rohan Bopanna leh Rutuja Bhosale-te chuan mixed doubles tennis final-ah gold medal an la a ni.

Mi 3 inkawp Squash game-ah Saurav Ghosal, Abhay Singh, leh Mahesh Mangaonkar-te chuan gold medal an la a; Sarabjot Singh leh Divya TS-te chuan meter 10-a thui Air Pistol inkahsiakah Silver medal an hlawhchhuak bawk a ni.

Badminton-ah India mipa team chuan nimin vek khan Semifinal-ah Korea chu 3-2 in an hneh a, waviin hian China nen final an khel ang.

(NewsOnAIR)

<><><>